


TEZAU LITURGIC
27 NOIEMBRIE

SLUJBA
SF. CUVIOASE-MUCENIȚE
RAFAELA
TARTATKOI
DE LA
CIGHIRINSK



MOSCOVA, 2000



**Служба
преподобномученице Рафаиле,
игумении Свято-Троицкого
Чигиринского женского
монастыря**

На малей вечерни

На Господи, воззвах: стихиры, глас 2.

Подобен: ДOME Евфрафов:

ДомЕ Святыя Троицы, украсися светло, се бо Троицы служительница вонь приходит, Творца славящи.

Дом воистинну и селение Бога явилася еси чистая и честная душа твоя, мати, темже ныне во дворех святых водворяешися, ликующи светло.

Дома Божия красоту возлюбльшая, и небо паче земли избравшая, днесь премудрая Рафаила да почтится, тая бо присно молится, во еже спастися душам нашим.

Домом мучеников, и селом приявшим семя кровь мучеников, явися ныне земля Черкасская, светло украшенная, яко бисером, кровьми угодников многих.

Слава, глас 8:

Мати мученице, богоблаженная Рафаило, не престай молиться о почитающих и поющих страдания твоя яже о Христе Иисусе.

И ныне: праздника, или Богородичен, глас 8.

Творение Афанасия исповедника.

Подобен: О, преславного чудесе:

О, преславного чудесе! Небесе и земли Царица, от святых сродников наших умоляемая, до ныне землю Русскую покрывает и лика Своего изображении милостивно обогащает. О, Владычице Державная! Не престани и на будущее время во утверждение на Руси Православия милости и чудеса изливати до века. Аминь.

На стиховне стихиры, глас 5:

Радуйся, мати чистая, блаженная страсотерпице Рафаило, крест Христов на рамо взявшая радостно, и Небесному Жениху обручившаяся, и ныне радующаяся во обителех приснорадостных.

Стих: Дивен Бог во святых Своих, Бог Израилев. Радуйся, премудрая инокинь наставнице, и ко спасению путеводительнице, и мученице изрядная, Рафаило святая, земных страстей избегшая, и ныне в горних селении царствующая.

Стих: Приведутся Царю девы в веселии и радовании.

Радуйся, мудрым девам уподобившаяся, и елеем благодати Божией обильно душу твою обогатившая, Рафаило мудрая, Жениха Христа возлюбившая, и от Него возлюбленная, и с ним во веки пребывающая на небеси.

Слава, глас 4.Подобен: Яко добля:

Яко изрядную в мученицех, и в преподобных славнейшую, сошедшеся днесь восхваляем тя, мати наша Рафаило, течение совершила еси, и веру до конца соблюдши, прияла еси от Бога нетленный венец. Темже ко Подвигоположнику помолися ныне от бед избавиться верою совершающим всечестную память твою.

И ныне: праздника, или Богородичен, глас 4: Богородице, Надеждо ненадежных, не закосни, но поспеши на помощь нам, во всяких гресех углубающих, обаче имущих изрядную надежду на Тя, Всеблагая.

Тропарь, глас 1:

Агница Христова мати Богоблаженная Рафаило, и наставница мудрая агниц Его явилася еси, венца мученичества сподобилася еси от десницы Иисусовы, Емуже не престай моляся, да соблюдет в мире Церковь Православную, и

обитель твою от всех навет вражиих защитит, и спасет души наша, яко Милосерд.

На велицей вечерни

Блажен муж: 1-й антифон.

На Господи, возвах: поставим стихов 8.

И поем стихиры праздника 3, и святой 5.

Аще ли же вне праздника, святой стихир 8 и поем повторяюще по дважды первыя три, прочия же единожды.

Глас 4.Подобен: Яко добля:

Яко изрядную в мученицех, и в преподобных славнейшую, сошедшеся днесь восхваляем тя, мати наша Рафаило, течение совершила еси, и веру до конца соблюдши, прияла еси от Бога нетленный венец. Темже ко Подвигоположнику помолися ныне от бед избавиться верою совершающим всечестную память твою.

Глас 1:

Пришедше во храм днесь, духовную песнь воспоим матери нашей Рафаиле, игумении богомудрей, преподобномученице Черкасстей, яже, красоту мирскую презрев, мирскаго мятежа избеже, безбожных мучителей никакоже убоявшеся, на Господа все упование свое возложи.

Отверзошася уста безбожная, зияюща пожрети

агницы Христовы, хулы глаголя и изгоняща сих от пажитей духовных; обаче образу жития ангельскаго не измениша, крест Его на ся вземшии.

Иго благое Христово в годину прещения от безбожных смиренно понесоша, муки и смерть прияша, днесь с сонмы ангельскими ликуют и ко Господу возносят молитвы о чтущих всечестную память их.

Радуется и веселится земля Черкасская днесь, память богомудрыя матере нашея Рафаилы празднующи, честно величается град Чигирин, в себе крин неувядаемый, тело святых игумении, имуще.

Слава, глас 6:

Чином монашеским наставнице и лику святых мучениц причастнице, мати Рафаило богомудренная, днесь похвальную ти песнь приносяще, молим тя: испроси нам у Христа Бога милости на суде, таже и вся благая, ко спасению благопотребная.

И ныне: праздника, или догматик: Кто Тебе не
ублажит:

Вход. Прокимен дне. И чтения три.

Ко ефесеем послания святого Апостола Павла
чтение (6:10-16):

Братие, возмогайте во Господе и в державе крепости его: облецытеся во вся оружия Божия, яко возмощи вам стати противу кознем диавольским: яко несть наша брань к крови и плоти, но к началом, и ко властем, и к миродержителем тмы века сего, к духовом злобы поднебесным. Сего ради примите вся оружия Божия, да возможете противитися в день лют и вся содеявше стати. Станите убо препоясани чресла ваша истиною, и оболкшеся в броня правды, и обувше нозе во уготование благовествования мира: над всеми же восприимше щит веры, в немже возможете вся стрелы лукаваго разжженныя угасити: и шлем спасення восприимите, и меч духовный, иже есть глагол Божий.

К Тимофею послания святого Апостола Павла
чтение (2 Тим. 4:1-8):

Чадо Тимофее, засвидетельствую убо аз пред Богом, и Господем нашим Иисус Христом, Хотящим судити живым и мертвым в явлении Его и царствии Его: проповедуй слово, настой благовременне и безвременне, обличи, запрети, умоли со всяким долготерпением и умением. Будет бо время, егда здраваго умения не

послушают, но по своим похотех изберут себе учителя, чешими слухом, и от истины слух отвратят, и к баснем уклонятся. Ты же трезвися о всем, злопостражди, дело сотвори благовестника, служение твое известно сотвори. Аз бо уже жрен бываю, и время моего отшествия наста. Подвигом добрым подвизахся, течение скончах, веру соблюдох. Прочее убо соблюдается мне венец правды, егоже воздаст ми Господь в день он, праведный Судия, не токмо же мне, но и всем возлюбльшим явление Его.

Ко евреем послания святого Апостола Павла
чтение (11:33-40):

Братие, святии вси верою победиша царствия, содеяша правду, получиша обетования, заградиша уста львов, угасиша силу огненную, избегоша острей меча, возмогоша от немощи, быша крепцы во бранех, обратиша в бегство полки чуждих: прияша жены от воскресения мертвых своих: инии же избиени быша, не приемше избавления, да лучшее воскресение улучат. Друзии же руганием и ранами искушение прияша, еще же и узами и темницею: камением побиени быша, претрени быша, искушени быша, убийством меча умроша, проидоша в милотех и в козиях кожах, лишени, скорбяще, озлоблени: ихже не бе

достоин весь мир, в пустынях скитающесе и в горах и в вертепах и в пропастях земных. И сии вси, послушествовани бывше верою, не прияша обетования: Богу лучшее что о нас предзревшу, да не без нас совершенство примут.

На литии стихиры самогласны, глас 1:
Светло храбрствующи, Рафаила славная во страдании своем небесныя силы веселит, с ними же радующесе ныне, на земли верныя торжествовати воздвиже. Тую бо достойно почтим в пении и песнех духовных, яко добрую рабу Господню, молящуюся Христу Богу даровати нам велию милость.

Глас 4:

Приспе время отшельствия ко Господу преподобныя Рафаилы, воительницы мужемудренныя и начальницы агниц словесных обители Свято-Троицкия. Тая же, от неистовых безбожник гонимая, аки злато в горниле, во страданиих совершенно очистися, в ангельския селения радующесе вниде, идеже о нас усердно ныне молится.

В гонениех скорби претерпела еси, памятующи слова Господа: аще Мене изгнаша, и вас ижденут; темже, от мучителей не укрывающися, мученический конец жития от богоборцев претерпела еси, богоблаженная.

Слава, глас 5:

Неувядаемый венец от Христа приявшая, молится ныне святая о чтущих память ея, темже, людие Черкасстии, песньми воспоим честная страдания преподобной мученицы Рафаилы, Христа, дивнаго во святых почитающе.

И ныне: праздника, или Богородичен сей, глас 5: Матери Божией приведошася вслед девы, искреннии Ея приведошася в храм Царев, с нимиже и славная Рафаила от града Чигирина пришедшая в горняя селения, Честнейшую Херувим воспеваает.

На стиховне стихиры, глас 1:

Молитвы на всякий час возносила еси, мати, на небо от земли сердце свое возносящи, и в Царствие Христово вход себе уготовляющи; темже прияла от Бога обильный дар молитися о чтущих память твою благочестно.

Стих: Яко Тебе ради умерщвляемы есмы весь день.

Христовых агниц питала еси духовно, ко спасению тех наставляющи, учащи ни прещення от хульных безбожников, ниже самья смерти не бояться; темже вольно Христу Жениху сочетавшыся, со всеми святыми ныне на невесех царствуют.

Стих: Вменихомся яко овцы заколениа.

Духовныа подвиги явила еси по изгнании от обители, в мире надмирно поживши, темже от руки Божией приятую во время гонений не оставила обитель твою, и ныне молитвами твоими, мати преподобная, из небытия возставляющи ю и питающи яко небесною манною, молитвами и щедротами Христовыми.

Слава, глас тойже:

Агниц Христовых собранию явилася еси, Рафаило, причастница, и новомучеников земли Черкасстей купножительница, скорби и смерть за Христа приявшая, и веру даже до конца неврежденно сохранившая. Мы же прославляем страдания твоя, мученице святая, и молим тия: молися Христу прилежно о всех нас, да спасет души наша, яко Милосерд.

И ныне: праздника, или Богородичен, глас 1: Преславная Приснодево, Премилостивая Мати и Дево Пречистая, молитвами преподобных дев, Сыну Твоему угодивших, спаси души наша.

На благословении хлебов тропарь, глас 1: Агница Христова мати Богоблаженная Рафаило, и наставница мудрая агниц Его явилася еси, венца мученичества сподобилася еси от десницы Иисусовы, Емуже не престай моляся, да соблюдет в мире Церковь Православную, и

обитель твою от всех навет вражиих защитит, и спасет души наша, яко Милосерд.

На утрени

На Бог Господь: тропарь праздника дважды.

Слава, святой. И ныне: праздника:

Аще ли же вне праздника, поем тропарь святой с Богородичном, якоже есть обычай.

По 1-й стихологии седален праздника, Слава: святой, глас 4:

Монашескаго стояния и посреде безбожных не отвергшаяся, и от церковнаго правила не отступльшаяся, кровию своею, преподобная, за Христа излиянною, землю нашу в сонме новомучеников ты осватила еси.

И ныне: праздника или Богородичен: Матери и девы вкупе молитвы приносят воплощению Бога послужившей, Ейже Ангелов множества песни воспевают и человецы, яко к Скоропослушнице, припадают.

По 2-й стихологии, седален праздника, Слава: святой, глас 4:

Дивно во святых Бог прославляется, дивно в женстем немощнем телеси диавол посрамляется. Кровию своею запечатлевши Христово

исповедание, к чертогу Его восходит игумения Рафаила, о верных Того присно молящи.

И ныне: праздника или Богородичен: Скорбящих и обидимых Заступница и Утешительница явилася еси, Мати Господа нашего, яко учеников Его первейшая и закона любви Его лучшая исполнительница.

Полиелей.

Величание:

Величаем тя, страстотерпице преподобная, мати Рафаило, и чтем честная страдания твоя, яже за Христа во утверждение Православия претерпела еси.

И псалом избранный.

По полиелеи седален, глас 4:

Послана бысть Христом Пастыреначальником пасти агниц Его, преподобная, таже к лику святых дев, Господеви прежде пожренных, приложилася еси, сотвори убо с ними о нас молитву, во еже спастися душам нашим.

Слава, и ныне: праздника.

Или Богородичен сей, глас тойже:

Неувядаемый крин девства, ангелов и всех святых превысшую Деву Пресвятую воспоим, яко спасения нашего Родительницу и образа Его на земли почитателей Хранительницу.

Степенна, 1-й антифон 4-го гласа.

Прокимен, глас 4: Дивен Бог во святых Своих, Бог Израилев. Стих: В Церквах благословите Бога, Господа от источник Израилевых.

Всякое дыхание:

Евангелие от Матфея, зачало 104.

По 50 псалме стихира самогласна, глас 6:

Днесь вселенная вся преподобномученицы просвещается зарями, и Церковь Христова кровью твоими, яко цветы некими украшаемая, вопиет ти, Рафаило: угоднице Христова и заступнице теплая, не престай моляся о рабех твоих.

Или сия, глас тойже:

Во время гонений от безбожных, звания монашеского не отреклася еси и правила иноческого не оставила еси, в мире в молитвах о мире присно пребывая, темже на небеси предстоя Престолу Вседержителю, Рафаило честная, молися Ему присно о память твою ныне совершающих и честне лобызующих святых мощи твоя.

Канон праздника на 6, и святых, на 8, глас 8, егоже краегранесие:

Страдания претерпевшая святая нами
ублажается.

Песнь 1

Ирмос: Воду прошед яко сушу и египетскаго зла избежав, израильтянин вопияше: Избавителю и Богу нашему поим.

Припев: Святая преподобномученице Рафаило, моли Бога о нас.

Сетей лукаваго посреди безбожных живуци избавльшаяся, молитвы воссылала еси о отечестве земнем, ныне же от земли сама преставилася еси и наша молитвы приемлещи. Ты воду искушений немокренно прошла еси, Рафаило, и Избавителю представше, венец повелительный на главу твою от десницы Господней прияла еси.

Рафаиле, игумений обители Троицкия, приносяще моления, всякого злаго обстояния чаем избавление прияти.

Аще и тело твое, чистая, растерзаша, яко львоуе, безумнии мучителие, обаче души твоей не возбраниша полчища бесов лютых на небо восход совершити.

Богородичен: Дверь Небесная, Пресвятая Дево, нам явилася еси, яко Тобою нам спасения вход отверзся Рождеством Твоим.

Песнь 3

Ирмос: Небеснаго круга Верхотворче Господи и Церкви Зиждителю, Ты мене утверди в любви

Твоей, желаний краю, верных утверждение,
едине Человеколюбче.

Агниц, пожершихся Владыце от лет древних,
любве ко Христу подражала еси, мати,
неугасимым светильником веры Жениха сретила
еси и на брак Агнчий вошла еси радостно.

Небесных селений жительница, мощи своя нам
оставила еси в память страданий за веру во
Христа, Егоже возлюбила еси всем сердцем
твоим.

Иже вере твоей подражающим, и мощем
покланяющимся твоим, и в помощь молитвенно
призывающим тя, буди помощница, Рафаило,
мати преподобная.

Явилася еси мудрая паче Евы, праматере твоя:
та бо лукаваго льсти внимаше, ты же вся козни
диавольския поправши, от слуг его умерщвления
прияла еси, жизни вечные обручение приявши.

Богородичен: Помощница матерем и девам
Покрове, бельцем Заступница и иночествуящим
Защищение, Господа Иисуса Родительница и
вопиющим к Тебе крепость Ты еси, Марие
пресладкая.

По 3-й песни кондак праздника и икос.

Седален святых, глас 8:

Благочестия образы умудрившись, нечестия
прелесть низвергла еси, мученице, и

Божественным деланием присно распалемая, мучителей угасила еси безбожное свирепство. Темже источаеши исцеления верою притекающим и празднующим любовь святую память твою, преславная Рафаило.

Слава, глас 4:

Возбуди нас твоими молитвами, преподобная, аки дев нерадивых, яже уснуша в час сретения Жениха, да, тебе подражающи, светильницы своя елеем благодати присно наполняюще, чертоги Его не отвержены пребудем.

Слава, и ныне: праздника, или Богородичен: Лествице Иаковля, буди нам к небесному восхождению Помощница, Пресвятая Дево, молитва во Матерня Твоя многа может, во еже спасти всякаго, с любовью лобзающая лика Твоего честнаго изображение.

Песнь 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Радости вечныя сподобльшаяся, оскудевающим в вере молитвами твоими ко Господу помощь подай, во еже, умножившейся вере нашей, радости небесныя уллучим.

Емшым тя беззаконным, тех суровства никакоже убоялася еси, преславная, и посреде

мучений прославила еси Христа, Рафаило преподобная.

Твоих молитвенник не презри, преподобная, вознеси ко Престолу Вседержителю моления наша, да и мы от Него спасение душам нашим улучшить сподобимся, прославляюще Его Божество.

Елико мощно нам, к тебе взывать будем, Рафаило, страстотерпице, нам скорая услышательница буди и пред Христом Ходатаица о прославляющих Его Божество.

Богородичен: Радование ангелом приимшая, радости вечныя сподоби и нас, Матерь Божию Тя Именующих и почитающих образ Твой и Сына Твоего.

Песнь 5

Ирмос: Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.

Поболевши на земли и много пострадавши, душу свою исцелила еси совершенно, и спасение бысть плод страданий твоих, еже от Человеколюбца Господа прияла еси, преподобномученице.

Егоже возлюбила еси Христа умоли, да сподобит и нас в вере твердей и надежде несумненной любви сподобитися Божественныя.

Вседержителевою мышцею укрепляема,
прещения безбожных в ничтоже вменяючи,
смерть прияла еси, яже восход в небесная явися
тебе.

Шатания безбожных, на многая лета нашедшия
на страну нашу, десницею Господнею
сокрушишася, молитвами же твоими ко Господу
от сих и мы присно избавитися чаем.

Богородичен: Аще к Сыну на Небо с телесем
взята была еси, Пречистая, обаче ушеса Твоя
скоры есть на слышание молящих Тя, руце же
быстры на помощь исправляющим житие свое в
воле Сына Твоего.

Песнь 6

Ирмос: Молитву пролию ко Господу и Тому
возвещу печали моя, яко зол душа моя
исполнися и живот мой аду приближися, и
молюся, яко Иона: от тли, Боже, возведи мя.
Яже древних мучениц образу страданий
подражающая, и наши души да укрепиши в
терпении и исповедании веры православныя:
явилася бо еси, Рафаило, водительница инокинь
честных ко спасению.

Слыша Господь молитвы твоя на всяко время,
игумение премудрая, от среды скимнов
рыкающих на Церковь Его, обаче тело твое
растерзати сим попусти, да будеши хлеб Ему

чистый и жертва приятная.

Во дни древния зверем телеса предавшия сподобишася славы неувядаемая, тех стопам и мать наша Рафаила последоваше, ныне от нас песнями ублажается.

Яко львоуе, поглотити агницу Христову восхотевше безбожницы, обаче ничтоже успеша, и памяти сея погубити не возмогоша, Дух во Святый память ея в день сей быти в Церкви учреди.

Богородичен: Твоего заступления не отыми от нас, Богородице, в печалех житейских пребывающих и ко аду приближающихся в прегрешениях своих, мольбами к Сыну Твоему скоро к покаянию возстави.

Кондак, глас 6:

Агницу Христову Рафаилу прославляем, на небесех Ему предстоящую, память ея в храме творяще, к горним же сердца наша возносяще. Та бо от безбожных мучителей страдания и смерть претерпе, венец нетленный прият от Господа, и благодать молитися о нас, любовьию воспоминающих честная страдания ея.

Икос:

Противоста сонму лукавующих и на Церковь Христову злобою дышущих кроткая агница

Христова Рафаила, и от вепрей лютых растерзаема, крови алчущих, в мучении житие сконча. Обаче кровию ея честною потопаи Христос началовластие безбожное, и пламень гонений угаси, и дарова земли нашей в сонме новомученик Черкасских ходатаицу и молитвенницу о всех, любовь вспоминающих честная страдания ея.

Песнь 7

Ирмос: От Иудеи дошедше отроцы, в Вавилоне иногда верою Троическою пламень пещный попраша, поюще: отцев Боже, благословен еси. Аще изгнаша тя безбожнии от обители Троицы, во граде Чигирине бывшей, не возмогоша воспретити души твоей в небесную обитель внити, вопиющей: отцев Боже, благословен еси. Яже исцелению Божию, Рафаило, тезоименитая, подаждь душам и телесам нашим исцеление, в помощь ты призывающим и поющим: отцев и матерей преподобных Боже, благословен еси. На небеса восшедши верою твердою, молитвою ко Святей Троице ты, мати, нам помози, поющим: отцев Боже, благословен еси. Ангельскаго чина светлое украшение и миряном похвала еси, игумение Рафаило, молися о нас, поюще: отцев Боже, благословен еси.

Богородичен: Марие Дево, пламень страстей наших угаси благодатию Твоею, предстательствующи прилежно о вопиющих: отцев Боже, благословен еси.

Песнь 8

Ирмос: Царя Небеснаго, Егоже поют вои Ангельстии, хвалите, и превозносите во вся веки.

Иже Ангельским ликом подражающих предстательством ко Господу укрепи, поющих Ему хвалу, Рафаило славная.

Ученьми апостолов и святых отец душу насыщала еси на земли, сих вере подражаючи, и о нас, православного учения держащихся, пред вся Сотворшим буди ходатаица.

Болезней и скорбей исполнено бысть житие твое во отечестве твоем земнем, от Бога отлучившемся; радости же вечныя сподобльшися, о обращении многих ко Христу ныне радуешься, мати преподобная.

Людем, тебе летную память творящим, буди в житии сем помощница и душам от жизни отлучающихся к Царствию Небесному путеводительница.

Аще и устне грешнии имамы, обаче пети святым похвальная навыком, сего ради и страстотерпице Рафаиле моление днесь честно

совершаем.

Богородичен: Живота вечнаго Родительнице, жизнь вечную уллучити и нас сподоби, на Тя упование имущих.

Песнь 9

Ирмос: Воистину Богородицу Тя исповедуем, спасеннии Тобою, Дево Чистая, с безплотными лики Тя величающе.

Адовыми враты неодолима Церковь Христова нашими усты ныне песнь благохваления тебе, Рафаило, приносит.

Емуже молитвы, моления, пощения и коленопреклонения приносившая, умоли Христа о память твою чтущих и совершающих, яко да милость Свою выну пробавит на нас.

Тяготу от хулителей приявшая, безбожных началовластие и варвар гонение купно со всею Церковию претерпевшая, достойно мзду во граде Небеснем со всеми святыми уллучила еси. Славим преподобномученицу Рафаилу, вернии, хвалу Господеви о ней воспевающе, яко земли нашей и Церкви новое украшение даровася.

Богородичен: Яже Ангелом говейная и нами присночтимая, буди, Марие, Мати Господа, нам путеводительница в Царство Сына Твоего, якоже древле тьмам святых Его.

Светилен

Подобен: Апостолы от конец:

Приими наше пение и помолися ко Христу, святая, да избавит сердца наша от прилога бесовскаго и страстей, вшедших в нея.

Слава, и ныне: праздника, или Богородичен: Препрославленная от матерей и воспеваемая от дев, не остави нас, яко Едина Матерь и Дева еси Ты.

На хвалитех стихиры, глас 4:

Воспоем днесь терпение мужемудренное, прославим восход ко Пренебесным мудрыя игумении обители Чигиринския, нам бо, память ея ныне творящим, восхождению к горним есть помощница благодатию, яже от Бога стяжала есть.

Образу Христову и святым Его покланялася еси честне, Рафаило, в житии земнем, ныне же твоему образу покланяющихся приими молитвы и скорое предстательство сотвори ко Совершающему вся во благое Христу Господу. Благо есть нам, обретшим новую пред праведным Судиею предстательницу! Темже, Рафаиле славней днесь праздник составльше, последовати потщимся учащающим до рог олтаревых, хвалу Господеви воспевающе. Правила церковнаго верно держащимся

мирянном и монашеския правила соблюдающим иноком буди изрядная помощница, о всех же тебе чтущих ко Господу молитвенница.

Слава, глас 6:

Пребыла еси в вере непреклонна, сию житием своим посреде безбожных исповедала еси, яростию безумных убиена бывши, явилася еси миру, преподобномученице Рафаило, образ доблий всех добродетелей.

И ныне: праздника, или Богородичен: Ты еси лоза истинная, Богородице, возрастившая нам плод Живота вечнаго, молися, Девице, со святыми апостолы и мученики и всеми святыми, помилуватися, молимся, душам нашим.

Славословие великое.

По Трисвятом тропарь святых. Слава, и ныне, праздника, или Богородичен.

Отпуст.

На литургии

Блаженна, праздника песнь рядовая, и от канона святых, песнь 3.

Прокимен праздника, и святых, глас 4: **Боже,** дщери царей в чести Твоей.

Стих: Приведутся в веселии и радовании,
введутся в храм Царев.

Апостол дне, и святых, Римляном, зачало 99.

Аллилуиа дне, и святых, глас 6: **Яко се врази
Твои возшумеша и ненавидящи Тя воздвигоша
главу.**

Стих: Проидохом сквозе огонь и воде, и извел еси
нас в покой.

Евангелие дне, и святых, Матфеа, зачало 104.

Причастен праздника, и святых: **Радуйтесь,
праведнии, о Господе, правым подобает
похвала.**

На трапезе утешение.

**[Служба преподобномученице Рафаиле,
игумении Свято-Троицкого Чигиринского
женского монастыря. Чигирин, 2008.]**

